

# Powšitkowne WOZJEWJENJA

njedźelu, 26. meje 2019

## Serb dóstanje měšniku swjećiznu

Biskop Heinrich Timmerevers wudźěli sobotu, 8. junija, w 10 hodź. na Božej mši w Drježdžanskej katedrali z Kulowa pochadźecemu diakonej Pětrej Mrózej měšniku swjećiznu. Wšitcy wěriwi su na tutu Božu mšu přeprošeni a měli so za njeho kaž tež powšitkownje wo duchowny dorost modlić. Swoju primicu změje Pětr Mróz swjatkowničku, 9. junija, w 9 hodź. w Kulowskej cyrkwi.

## Nalětni koncert w klósterskej zahrodźe

Wšitkich zajimcow zbliska a zдалoka přeprošuje chór Lipa zhromadnje z Křescansko-socialnym kubłanskim skutkom na nalětni koncert, kotryž budže njedźelu, 26. meje, w 15.30 hodź. na zahrodźe Zežiwjenskeho a zeloweho centruma w klóštrje Marijinej hwězdze w Pančicach-Kukowje. Program wuhotuja Lipjenjo a česka skupina Lidová. Wot 15.00 hodź. poskića tam kofej a tykanc.

## Serbske kemše w Drježdžanach

Drježdžanscy Serbja su na maćernorěčnu Božu mšu tutu njedźelu, 26. meje, w 16.00 hodź. do cyrkwy swjateho Antonija w Drježdžanach-Löbtauwje, Bünauska hasa 10, přeprošeni. Kemše změje farar Gabriš Nawka. Božej mši přizamknje so zetkanje w tamnišej wosadnicy.

## Dźěłarnička k projektej „Lawski areal“

Załožba za serbski lud přeprošuje wšitkich zajimcow na zjawnu idejowu dźěłarničku k projektej „Lawski areal“ a rumnostnym kapacitam w Serbskim domje, kotraž wotměje so pjatk, 7. junija, wot 18.00 do 20.30 hodź. na žurli Serbskeho domu w Budyšinje. Direktor Załožby za serbski lud, Jan Budar, předstaji zawodnje dotalny staw koncepcije za twarski projekt na Lawskich hrjebjach. Nimo noweho domicila za Serbski institut, Serbski kulturny archiw a centralnu biblioteku rozmysluja wo dalšim přerjadowanju serbskich zarjadnišćow. Wotewrjene je nimo toho prašenje naslědneho wužiwanja štwórteho poschoda Serbskeho domu po wučehnjenu MDR. Wjace informacijow je na internetowych stronach [www.stiftung.sorben.com](http://www.stiftung.sorben.com) podatych.

## Přednošk k 300. kwasnemu dnjej Friedricha Augusta II. a Marije Josephy

W rjedze „Stawizny a stawiznički wokoło katolskeje Dwórskeje cyrkwy“ zaběra so Christoph Pöttsch njedźelu, 2. junija, z wusahowacym historiskim podawkom w Drježdžanach. Před 300 lětimi zmandželištaj so Friedrich August II., syn Augusta Sylneho, z dźowku Wienskeho kejžora Mariju Josephu. Christoph Pöttsch je so lěta dołho ze žiwjenjom a skutkowanjom tehdyšeje njewjesty a pozdžišeje sakskeje kurwjerchowki zaběrał. Jeho přednošk započnje so w 14 hodź. w Dwórskej cyrkwi. Wo hudźbne wobrubjenje postara so profesor Thomas Lennartz, kotryž zahraje na Silbermannowych piščelach.

## **Putniska jězba do Ukrainy**

Putniska jězba do ukrainskeho Lviva (pólsce Lwów, němsce Lemberg) wotměje so wot štwórtka do wutory, 8. do 13. awgusta, ze Šmitec jězbami w Radworju. Hłowne město zapadneje Ukrainy je ze swojimi stawiznami a kulturu wulce zajimawe. Wšako je w běhu svojich stawiznow přežiwiło pólske, rakuske, sowjetske a němske knjejstwo. Wobdźělím so na swjatočnej Božej mši po grjeksko-katolskim wobrjedže, wopytam mniši klóšter w Univje, wobhladamy sej katolsku uniwersitu, póndžemy do opery a zetkamy so z wěriwymi woneho města. Změjemy přewod domoródnego kulturnika a duchownu podpěru Bačońskeho fararja Gerata Wornarja. *T. Kubašec*

## **Program k projektej „Swětło pozbudža“**

We wobłuku wuměłstwoweje projekty „Swětło pozbudža“ su zajimcy wutoru, 28. meje, w 19.30 hodź. na Taizéske modlenje do Budyskeje cyrkwy Našeje lubeje knjenje přeprašeni. Katolscy a ewangelscy młodostni je wuhotuja.

Přednošk k temje „Dokelž njemóže wulke a krasne swětło schowane wostać – dohlad do žiwjenja swjateje Klary“ poskići so w klóšterku klarisow srjedu, 29. meje, w 19.30 hodź.

Dujerjo Małowjelkowskeje Bratrowskeje wosady zahraja njedźelu, 2. junija, w rjedže duchowneje hudźby w tachantskej cyrkwi. Cyłkowny program projekty „Swětło pozbudža“ je pod [www.posol.de](http://www.posol.de) wozjewjeny. *KP*